



21. februar 2023

UPA 2023/168

Inatsisartut Suleriaasianni § 36 naapertorlugu apeqquaqaat aallaavigalugu siunnersuut imaattoq matumuuna saqqummiuppara:

Qanoq iliornikkut eqqumiitsuliortut amerlanerit namminersortuunerulersissinnaavagut pisortaniillu tapiissutinik qinnuteqartuarterneq isumalluutaavallaarunnaartissinnaanera pillugu apeqquaqaat aallaavigalugu oqallisissiasatut siunnersuut.

(Inatsisartuni ilaasortaq Aqqalu C. Jerimiassen, Atassut)

Nunatsinni eqqumiitsuliortuuneq siuariartorpoq. Aatsaallu taamak atuakkiortut saqqummersitseqattaartigippit, nipilersortartullu oqaluttuarisaanermi aatsaat taamak saqqummersitseqattaartigalutik. Qujanartumillu ukiuni kingullerni taperneqarnissamut periarfissat pitsanngoriaateqarsimapput.

Taamaattorli eqqumiitsuliortuussagaanni namminersortoq, tapiissutit pitsaagaluaqisut inuussutissarsiutigissagaanni isumalluutaajuaannannginnissaat assut kissaatiginarpoq. Soorunalimi nunarsuaq tamakkerlugu eqqumiitsuliorneq inuussutissarsiutigissallugu ajornakusoortuaannarpoq, pikkorinnerpaallu taamaallaat inuussutissarsiutigisinnaasarpaat.

Nunatsinni eqqumiitsuliortut pikkorilluinnartut aamma taamaaliorsinnaasariaqarput pisortaniit killilersorpallaarunnaarutsigit tapiissutaannarnillu periarfissiiniarunnaarutta. Nunani assigiinngitsuni akileraartarnikkut eqqumiitsuliortut allatuulli namminersortutut periarfissaqartinneqarput, uagulli nunatsinni immikkut inatsisiliuunnikuuagut taamaaliorsinnaatinnagit.

Atassummiit isumaqarpugut eqqumiitsuliornermut inatsimmi nalunaarut killilersuisoq peertariaqartoq, eqqumiitsuliortortagut allatuulli namminersortutut akiligassamik nassiussaqaarsinnaalersikkumallugit. Atuarfeqarfinni eqqumiitsuliorneq sammineqarnerulertariaqarpoq, eqqumiitsuliornermullu isiginnittariaaserput allangortittariaqarparput sunngiffimmiinnaq suliassatut isigiunnaarlugu aamma inuussutissarsiutaasutut isigilerlugu.

Assersuutigeqqiinnarlugimmi nipilersorneq atuakkiortuunerlu aammalu qalipakkanik allanillu kusanartulianik sammisaqaraanni nunami sumiikkaluaraanniluunniit suliarineqarsinnaammata.

Siornatigut nipilersortartut nipilersorsimatillutik akileraartarnermiit malersugaasarsimangillat. Savalimmiuni pissuserineqartoq atulertigu. Nipilersorfinni mikinerusuni café-ni allanilu inukitsuni nipilersortartut akileraartarunnaartillugit, tassami akissarsiaasut annikereerujussuarmata sooq akileraarusileriffimmiit malersortariaqarpagut?



Inernerissagalarpaa illoqarfinni mikinerni nipilersornikkut annerusumik pikialaarfiulernissaat,
nipilersortumut aaqqissuisumullu akilersinnaanerusumik.